



N°33
Entrée le 23.11.2023
Chambre des Députés
Déclarée recevable
Président de la Chambre des Députés
(s.) Claude Wiseler
Luxembourg, le 24.11.2023
Chambre des Députés

Claude WISELER
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 23/11/2023

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un de Minister fir Öffentlechen Déngscht weiderzeleeden.

Am Fall vun schwéieren Krankheeten oder Accidenter kann een als Aarbechter:in ganz séier vill Deeg a Wochen Krankeschäin sammelen. Momentan gëllt, dass d'CNS bis zu 1,5 Joer Krankeschäin op enger Referenzperiod vun 2 Joer bezillt. Duerno erfällt beim Staat eng Kënnegung. Eppes wat zum Beispill d'AEK kritiséiert, well et dozou féiert, dass dës Persounen net méi kënnen zrëck bei de Staat schaffe kommen, wann se erëm gesond sinn. D'Regierung kënnegt an hirem Accord fir 2023-2028 un, dëst Gesetz reforméieren ze wëllen.

An deem Zesammenhang wéilt ech dem Minister dës Fro stellen:

1. Wéi vill Persoune sinn an deene leschten 10 Joer beim Staat entlooss ginn opgrond vun der 52 an duerno 78 Wochen-Reegel? Wéi vill Leit waren et am ale Regimm vun den 52 Wochen? Wéi vill an dem vun 78 Wochen?

Mat déiwem Respekt,

POLIDORI Ben
Députéierten





**Äntwert vum Här Minister fir d'Fonction publique Serge Wilmes op d'parlamentaresch Fro
N°33 vum 23. November 2023 vum honorabelen Deputéierte Ben Polidori**

A senger parlamentarescher Fro, wëll den honorabelen Deputéierte wësse, wéi vill Persounen "an deene leschten 10 Joer beim Staat entlooss gi sinn opgrond vun der 52 an duerno 78 Woche-Reegel".

Déi sougenannten "52 oder 78-Woche-Reegel" betrëfft beim Staat déi Agenten, déi ënnert dem Regimm vum Staatsaarbechter agestellt sinn. Do applizéiert sech dann de Code du travail an de Kollektivvertrag vun de Staatsaarbechter. Duerch déi Laangzäit-Krankmeldunge gëtt den Aarbechtskontrakt net gekënnegt (licenciement), mee en hält op (cessation).

Well et sech net ëm eng Kënnegung handelt, kënnen déi betraffe Persounen erëm beim Staat agestellt ginn.

Zanter 2013 huet bei ongeféier 80 Persounen de Kontrakt op der Basis vun där Reegel opgehal.

Wann een d'Aleedung vum honorabelen Deputéierte senger Fro liest, wou en de Kontext beschreift, schéngt et awer esou ze sinn, dass et net ëm d'Staatsaarbechter geet, wou déi sougenannten "52 oder 78-Woche-Reegel" spillt, mee dass et u sech ëm d'Statesemployéë geet, déi no längerer oder ville Krankmeldungen de Kontrakt kënnen gekënnegt kréien.

Bei de Statesemployéë gëtt et déi sougenannten "52 oder 78-Woche-Reegel" net.

D'Gesetz iwwert de Regimm vun de Statesemployéë gesäit vir, dass wann en Employé, deen nach net am Pensionsregimm vun de Fonctionnaires ass, iwwert eng Period vun engem Joer gekuckt, méi wéi 6 Méint krankgemellt ass, säi Kontrakt ka gekënnegt ginn. Deen Delai vu 6 Méint kann op Basis vun engem ausféierleche medezinesche Rapport ëm 3 Méint verlängert ginn. Duerno gëtt d'Pensionskeess (CNAP) saiséiert, déi den Dossier da weidergëtt un de Contrôle médical. Op Basis vun de Conclusiounen vun engem Kontrolldokter, gëtt dann decidéiert, ob déi betraffe Persoun eng Invalidérent kritt oder net. Wann net, da kann et eventuell sinn, dass déi zoustänneg Kommissioun fir Reklassementer saiséiert gëtt an den Agent en interne Reklassement kritt (eng aner Plaz oder eng Reduzéierung vun der Aarbechtszäit). Wann et net zu enger Invalidérent oder engem interne Reklassement kënnt, da kann de Kontrakt gekënnegt ginn.

D'Konsequenz vun enger Entloossung ass effektiv esou, dass een net méi beim Staat als Fonctionnaire oder Employé kann agestellt ginn.

Well am Gestionsprogramm vun de Paie vum CGPO keen Ënnerscheid gemaach gëtt aus wéi engem Grond de Kontrakt gekënnegt gouf, kann ech dem honorabelen Deputéierte keng genee Zuelen dozou ginn. Et kann een awer dovun ausgoen, dass an der Moyenne e Grappvoll Leit pro Joer betraff ass.

Lëtzebuerg, den 10. Januar 2024

De Minister fir d'Fonction publique

(s.) Serge Wilmes